

## Mid-Day Dogri News Bulletin, 29th March 2025

समे – 12:25

<><><><><><>

### Kathua Operation

कठुआ जिले च इसलै पुलस आस्सेआ आतंकवादी विरोधी अभियान चला'रदा ऐ। पुलस नै इस इलाके च इक बड़डा तलाशी अभियान चला'रदा ऐ ते आतंकवादिएं दा पता लाने लेई ड्रोन, खोजी कुत्ते ते दस्ते दी तैनाती कीती गेदी ऐ। डीजीपी नलिन प्रभात होरें इस गल्ला गी परतियै आखेआ ऐ जे जिसलै तगर आतंकवाद गी पूरी चाल्ली खत्म नेई कीता जंदा, उसलै तगर पुलस अराम नेई करोग। उनें आखेआ जे शहीद पुलस दे जवानें दी जान दी भरपाई शब्दें कन्नै नेई कीती जाई सकदी ऐ। उनें एह बी आखेआ जे एह कारवाई अजें बी जारी ऐ ते अफसर ते टीमां संभावित खतरे गी खत्म करने लेई सक्रियता कन्नै कम्म कर'रदियां न।

<><><><><><>

### MoS BIRAC

भारत दे बायो-टैक सेक्टर गी बढ़ावा देने आस्तै केन्द्रीय मंत्री डॉ. जितेन्द्र सिंह होरें बायोटेक्नालोजी मैहकमे दे वरिष्ठ अधिकारिएं कन्नै उच्च सतह दी बैठक कीती। उनें स्टार्टअप्स ते बायोमनुफैक्चरिंग च तेजी आहन्नने लेई राज्य सरकारें रलियै देसै च बायोटेक्नालोजी उद्योग अनुसंधान सहायता परिषद यानि बायोटेक्नालोजी इंडस्ट्री रिसर्च एशोरेंस काउंसल केन्द्रें दी स्थापना दा प्रस्ताह दित्ता। डॉ. सिंह होरें बायो-ई3 सैल स्थापत करने लेई राज्य ते केन्द्र शासत प्रदेश दी सरकारें कन्नै गल्लबात करने दी लोड़ पर जोर दित्ता। जेहदा मकसद बक्ख-बक्ख क्षेत्रें च बायो-टैक क्षमता दा सदुपयोग करना ते नवाचार गी बढ़ावा देना ऐ।

<><><><><><>

### PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम "मन की बात" च इस बारी 30 मार्च गी कल देश विदेश च रौहने आले श्रोताएं कन्नै बचार सांझे करगंन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह

120मीं किश्त होग। एह कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग। एहदे कन्नो कन्नी एहदा सिद्धा प्रसारण ए. आई.आर न्यूज, डीडी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एहदा डोगरी च अनुवाद प्रसारत कीता जाग। एहदा डोगरी अनुवाद तुस रातीं 8 बजे इक बारी परतियै सुनी सकदे ओ।

<><><><><><>

### MWCD Bal Purskar

महिला ते बाल विकास मंत्रालय नै प्रधानमंत्री राष्ट्रीय बाल पुरस्कार लेई आवेदन मंगे न। आवेदक 11 अप्रैल थमां राष्ट्रीय पुरस्कार पोर्टल राएं आवेदन करी सकदे न। मंत्रालय नै इक ब्यान च आखेआ ऐ जे कोई बी बचा जेहड़ा भारत च रौहने आला भारतीय नागरिक ऐ ते जेहदी उमर 5 ब'रे ऐ ते 31 जुलाई 2025 तगर 19 ब'रे शा बद्ध उमरी दा नेई ऐ, ओह इनें पुरस्कारें लेई आवेदन भरी सकदा ऐ। मंत्रालय बहादुरी, खेड्ड, समाज सेवा, विज्ञान ते संस्कृति दे क्षेत्र च उपलब्धियां हासल करने आले बच्चे गी सम्मानत करने लेई हर ब'रे प्रधानमंत्री राष्ट्रीय बाल पुरस्कार दा आयोजन करदा ऐ। ऑनलाइन आवेदन करने दी खीरी तरीक 31 जुलाई रखी गेदी ऐ।

<><><><><><>

### Anti Drug R.S.Pura

नशाखोरी कन्नै निबड़ने लेई इक महत्वपूर्ण गैह दे तौरा पर पुलस स्टेशन आर.एस.पुरा आस्सेआ सिविक एक्शन कार्यक्रम तैहत नमें अगरा चक्क च इक नशा विरोधी रैली दा आयोजन कीता गेआ। इस रैली च युवाएं, मकामी लोकें ते खडारिएं बधी चढ़ियै हिस्सा लैता। एसडीपीओ गुरमीत सिंह ते इंसपेक्टर रवि सिंह परिहार सनें पुलस दे वरिष्ठ अधिकारिएं बी इस रैली च हिस्सा लैता। नशे मिमां बचाह बारे एह जागरूकता रैली राधा कृष्ण मंदर च जाइयै समाप्त होई।

<><><><><><>

### Kishtwar Beautify

सैलसफा गी बढ़ावा देने ते कस्बे दी सुदरता गी होर सनाकड़ा बनाने लेई कल किश्तवाड़ दे डिप्टी कमीशनर राजेश कुमार शवन होरें किश्तवाड़ दे एतिहासक किला टॉप उप्पर इक

सैल्फी पोआंइट दा उदघाटन कीता। किला टॉप किश्तवाड़ दे दक्खन-पच्छम च स्थापत इक ऐतिहासक थाहर ऐ। इस पहाड़ी उप्पर इक किला हा, जेहड़ा किश्तवाड़ दे राजे दे समें दा बने दा हा। # किश्तवाड़ पैहलकदमी दे हिस्से देतौरा पर इस परियोजना गी नगर निगम आस्सेआ 4 लक्ख रपे दी जागत कन्नै अमल च आन्नेआ गेआ ऐ। एहदा मकसद इस क्षेत्र दी समृद्ध इतिहास गी संजोइयै रखने ते सैलानिएं गी आकर्षित करना ऐ। डीसी होरें हिडियाल चौक ते शहीदी चौक च लग्गे दे फवारे दा बी अनावरण कीता जेहदे कन्नै कस्बे दी सुदरता च होर बी इजाफा होआ।

<><><><><><>

### **Sericulture Ramabn**

रामबन जिले दा रेशम उत्पादन मैहकमा रेशम दी राई-बाई गी बढ़ावा देने ते मकामी करसानें गी सशक्त बनाने आस्तै जागरूकता शिविरें दे राएं महत्वपूर्ण भूमिका नभा करदा ऐ। समें-समें पर आयोजित इनें कैपें दा मकसद करसानें गी रेशम दे उन्नत किस्में दे कीड़े पालन तकनीकें दे सरकारी योजनाएं दे फायदे बारे च शिक्षित करना ऐ। रेशम दे कीड़े दी राई-बाई च अनुभव प्रदान करदे होई व्यावहारिक प्रदर्शन कीते जंदे न। करसानें गी शहतूत दे बूहटे, लाजमी उपकरण किट ते होर केई लाजमी जानकारी बी दित्ती जंदी ऐ। मैहकमे दा मुख्य मकसद उच्च गुणवत्ता आले कोकून दे बधाना ते रेशम दे धागे दी आपूर्ति श्रृंखला गी मजबूत करना ऐ।

<><><><><><>